

MAURITIUS INSTITUTE OF EDUCATION
Revizion pou klas Grad 10, Kreol Repiblik Moris
Term I, Semenn 1 & 2

Not pou profeser

Aktivite revizion ki pe propoze baze lor bann konpetans langaz ki dan National Curriculum Framework Grad 7-9.

Profeser biensir lib pou swazir nonb aktivite ki li anvi ek adapte zot an-fonksion profil/nivo zelev, letan ki li ena ek so plan travay.

* *

ORAL

- Eski to finn deza fasine par enn personaz istorik ouswa fiktif? Eski to ti (pou) kontan vinn kouma li?

LEKTIR-KONPREANSION

- Lir tit sa text-la. Ki prediksyon to kapav fer lor seki pou ena dan pasaz-la?
- Lir text-la ek reponn bann kesyon ki swiv.

Tom-Le-Pirat

Lot kote sime ti ena lamer. Lorizon. Linfini. Avek biensir so vag ble, so disab fin ek enn soley sa mo frer, ki ti leve sak matin lor resif kouma enn benediksyon... Lamer. Mama lamer ti fale dir! Ki ti telman zenere. Pwason, krab, konokono, benitie, bigorno, palourd... Laplipar zabitan Poste-Lafayette ti bien mizer. Rar zot ti ena enn rounpi dan zot pos. Me dan enn lot fason, zot ti extra ris. Souvan mem san realiz li.

Tom ti pas boukou letan borlamer. Li ti enn bon plonzer. Li ti kav tini so lesouf pandan omwin enn minit ek plonz dan dilo 2 met fonder. Apre, li ti kontan asiz dan bor lamer ek get lorizon pandan lontan... La, so lespri ti vwayaze. Li ti reve lizie ouver. Tom ti enn gran rever.

Par exanp, parfwa li ti reve ki li ti enn pirat. Sirtou depi ki dan lekol li ti lir enn pasaz "L'île-aux-Trésors". Sa ti fer li reflesi enn ta. Opwin ki enn zour - enn zour ki li ti ape fixe lorizon - li ti fer vizyon ki enn bato pirat ti pe travers lapas Poste-Lafayette pou vinn zet lank dan lagon. Ah! Kouma li ti pou kontan pou grinp abor! Li ti pou ena enn long sab lor so flan, bann botinn lapo dan lipie ek enn bando nwar lor so lizie. Parey enn vie pirat!

Ah wi! Li ti pou konble. Li pa ti pou per personn ek tou dimounn ti pou per li! Ek sirtou, SIRTOU, li ti pou ena enn gran trezor pou dekouver. Enn trezor dan enn lamal dibwa, antere dan enn

landrwa sekre avek bann pies lor... Parfwa kan li ti mont dan lili aswar, kan lalimier ti tengn, li ti reve ki li ti Tom-Le-Pirat. Me, malerezman, souvan somey ti vinn kokin li avan li ariv lafin so bann lavantir...

Extre depi Jason Lingaya, *Ton Kamaleon*, CSU Edision, 2017.

- a) Dan ki landrwa sa resi-la pe deroule?
- b) Kifer narater dir ki fale dir “Mama lamer”?
- c) Pou ki rezon bann zabitan sa landrwa-la “extra ris”?
- d) Ki liv finn fer Tom reflesi boukou?
- e) Kifer dir ki Tom “ti pou konble”?
- f) Dapre twa, kifer ena boukou fraz ki fini par pwin sispansion (...) dan text-la?

VOKABILER

Fer enn sema kot montre tou mo ek expresion dan sa text-la ki kapav asosie avek pirat.

GRAMER

1. Relev bann fraz konplex dan sa pasaz-la ek dir kouma zot finn kree (zixtapozision, kordinasion, sibordinasion).
2. **Profeser** swazir inpe fraz ek demann zelev fer transformasion (e.g. fraz deklaratif a fraz inperatif, ou fraz inperatif a fraz interogatif, etc.).
3. Relev bann pronom dan pasaz-la ek indike ki li ranplase.

TRADIKSION

Profeser swazir bann mo, fraz ek parti dan sa pasaz-la ek demann zelev propoz enn tradikSION an Angle.

PRODIKSION EKRI

Imazinn ek ekrir enn lavantir ki Tom-Le-Pirat reve avan somey vinn kokin li.